

VENDIM
Nr. 487, datë 26.6.2026

**PËR ADMINISTRIMIN DHE PËRDORIMIN E FONDIT TË POSAÇËM TË
KRIJUAR NGA VEPRIMTARITË E LOJËRAVE TË FATIT**

Në mbështetje të nenit 100 të Kushtetutës dhe të pikës 5, të nenit 52/1, të ligjit nr. 155/2015, “Për lojërat e fatit në Republikën e Shqipërisë”, të ndryshuar, me propozimin e ministrit të Financave, Këshilli i Ministrave

VENDOSI:

1. Ky vendim ka për objekt përcaktimin e rregullave e të procedurave për administrimin dhe përdorimin e fondit të posaçëm, të krijuar nga veprimtaritë e lojërave të fatit, në vijim “Fondi”, përfshirë procedurat e arkëtimit, verifikimit, financimit, monitorimit dhe kontrollit të përdorimit të fondeve.

2. Fondi administrohet nga Autoriteti i Mbikëqyrjes së Lojërave të Fatit (AMLF), i cili ushtron funksionet e administrimit teknik dhe financiar të fondit, pa cenuar kompetencat vendimmarrëse të organeve përkatëse (Këshilli i Mbështetjes së Projekteve) për miratimin e projekteve.

Për këtë qëllim, AMLF-ja:

- a) administron llogarinë bankare të dedikuar të fondit;
- b) regjistron, monitoron dhe ndjek të gjitha arkëtimet dhe pagesat e fondit;
- c) mban regjistrin financiar të fondit dhe kryen rakordin periodik të të dhënave financiare me gjendjen e llogarisë bankare;
- ç) evidenton detyrimet e papaguara dhe njofton subjektet përkatëse;
- d) kryen verifikimin administrativ dhe financiar të dokumentacionit që lidhet me arkëtimin, administrimin dhe përdorimin e fondit;
- dh) përgatit dokumentacionin për ekzekutimin e pagesave për projektet e miratuara, të cilat realizohen nëpërmjet sistemit të thesarit;

e) administron dhe ruan dokumentacionin përkatës;

ë) kontrollon dhe monitoron përdorimin e fondeve në përputhje me qëllimin e miratuar.

3. Burimet e financimit të fondit përbëhen nga të ardhurat e përcaktuara në nenet 52 dhe 52/1, të ligjit nr. 155/2015, “Për lojërat e fatit në Republikën e Shqipërisë”, të ndryshuar, si dhe nga të ardhura të tjera të ligjshme, sipas legjislacionit në fuqi.

4. Për verifikimin e përmbushjes së detyrimeve financiare, që lidhen me fondin, AMLF-ja:

- a) miraton dhe publikon formatin e faturës për arkëtim;
- b) verifikon dokumentacionin financiar që shoqëron pagesat;
- c) kërkon informacion shtesë dhe të dhëna verifikuese nga administrata tatimore dhe institucionet përkatëse, në rastet kur evidentohen mospërputhje, paqartësi ose pasaktësi në deklaratimet apo pagesat financiare të subjekteve përkatëse.

5. Administrata tatimore bashkëpunon me Autoritetin e Mbikëqyrjes së Lojërave të Fatit (AMLF) për shkëmbimin e informacionit të nevojshëm për verifikimin e saktësisë së pagesave, arkëtimeve dhe deklarimeve financiare të subjekteve përkatëse.

6. Fondi përdoret vetëm për financimin e projekteve të miratuara nga Këshilli i Mbështetjes së Projekteve, i cili ushtron kompetencat vendimmarrëse për përzgjedhjen dhe miratimin e projekteve, në përputhje me legjislacionin në fuqi dhe qëllimet e përdorimit të fondit të përcaktuara në të.

7. Fondi nuk përdoret për:

- a) shpenzime që nuk lidhen drejtpërdrejt me zbatimin e projektit të miratuar;

b) financimin e aktiviteteve që mbështeten njëkohësisht nga fonde të tjera buxhetore për të njëjtin qëllim.

8. AMLF-ja kryen administrimin dhe përgatitjen e ekzekutimit të pagesave për projektet e miratuara vetëm mbi bazën e:

- a) vendimit të Këshillit të Mbështetjes së Projekteve;
- b) kontratës së financimit të lidhur me përfituesin;
- c) dokumentacionit justifikues financiar të paraqitur nga përfituesi.

9. Pagesat nga fondi kryhen nëpërmjet sistemit bankar, sipas fazave, kushteve dhe afateve të përcaktuara në kontratën e financimit.

10. Përfituesi i fondit ka detyrimin:

- a) të përdorë fondet në përputhje me qëllimin e miratuar;
- b) të administrojë dhe të ruajë dokumentacionin financiar të projektit;
- c) të vërë në dispozicion të AMLF-së çdo informacion dhe dokumentacion të kërkuar për verifikim dhe monitorim.

11. Në rast të përdorimit të fondeve në kundërshtim me qëllimin e financimit, të mungesës së dokumentacionit justifikues ose të konstatimit të parregullsive gjatë monitorimit:

a) AMLF-ja pezullon menjëherë pagesat dhe kërkon kthimin e fondeve të përfituara në mënyrë të parregullt, si dhe, kur është rasti, ndërpret kontratën e financimit. Zgjidhja e kontratës së financimit kryhet në përputhje me kushtet e përcaktuara në kontratë dhe legjislacionin në fuqi;

b) pas njoftimit me shkrim nga AMLF-ja për konstatimin e parregullsive dhe detyrimin për kthimin e fondeve, përfituesi është i detyruar të kthejë shumat përkatëse në llogarinë e fondit, brenda afatit të përcaktuar në njoftim. Në rast moskthimi brenda këtij afati, AMLF-ja ndërmer procedurat për rikuperimin e detyrimit në përputhje me legjislacionin në fuqi për detyrimet ndaj shtetit.

12. AMLF-ja publikon periodikisht në faqen zyrtare:

- a) fondet e arkëtuara dhe shpenzimet e realizuara;
- b) fondet e disbursuara;
- c) listën e përfituesve të fondeve, shumën e financimit dhe qëllimin e çdo projekti të miratuar;
- ç) raportin vjetor mbi administrimin financiar të fondit.

13. AMLF-ja kryen auditim të brendshëm për administrimin dhe përdorimin e fondit, në përputhje me legjislacionin në fuqi.

14. Ngarkohen Ministria e Financave dhe Autoriteti i Mbikëqyrjes së Lojërave të Fatit për ndjekjen dhe zbatimin e këtij vendimi.

Ky vendim hyn në fuqi pas botimit në Fletoren Zyrtare

ZËVENDËSKRYEMINISTËR
Albana Koçi